



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ
ՎԱՐՉԱԿԱՆ ԱԿՏ N 1518699
ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՎԵՐԱԲԵՐՅԱԼ

18 հունվարի 2023թ.

ք. Երևան

ՀՀ ՊԵԿ իրավաբանական վարչության պետ Ա. Մնացականյանս, ուսումնասիրելով ՀՀ ՊԵԿ հետաքննության և օպերատիվ հետախուզության վարչության 20.12.2022 թվականի թիվ 1518699 արձանագրության հիման վրա «ԱՐՏԱՇԱՏ-ՎԻՆԿՈՆ» ՍՊԸ -ի (ՀՎՀՀ 04210995, հասցե՝ ք. Երևան, Մամիկոնյանց 42-44) նկատմամբ հարուցված վարչական վարույթի նյութերը.

Պարզեցի

ՀՀ ՊԵԿ հետաքննության և օպերատիվ - հետախուզության վարչության պետի 24.11.2022թ-ի թիվ 1518699 որոշման համաձայն «ԱՐՏԱՇԱՏ-ՎԻՆԿՈՆ» ՍՊ ընկերության (այսուհետ նաև՝ Ընկերություն) նկատմամբ իրականացվել են ՕՀ միջոցառումներ: Իրականացված օպերատիվ - հետախուզական միջոցառումների արդյունքում պարզվել է, որ Ընկերությունը Արարատի մարզ, գ. Մխչյան, Արտաշատյան խճ 1/1 հասցեում զբաղվում է գինու և կոնյակի արտադրությամբ: Նշված հասցեում Ընկերությունը հանդիսանում է ինքնավար էներգաարտադրող և սպառող (հաշվառման բաժանորդային քարտի համարը 1002509) էլեկտրական էներգիայի փոխհոսքերի պայմանագրով ամրագրված հզորությունը 500 կՎտ է, իսկ մոնիթորինգի արդյունքում արձանագրված՝ տեղակայանքների փաստացի հզորությունը 775 կՎտ է:

2022 թվականի մայիսի 1-ից ուժի մեջ մտած «Էներգետիկայի մասին» օրենքում փոփոխություններ և լրացումներ կատարելու մասին» 2021 թվականի հունիսի 4-ի ՀՕ-261-Ն օրենքով «Էներգետիկայի մասին» օրենքը լրացվել է «Ինքնավար էներգաարտադրությունը և միկրոէներգաարտադրությունը» գլխով, որում տեղ գտած իրավակարգավորումների (56.1-րդ հոդվածի 5-րդ մաս) համաձայն՝ ինքնավար էներգաարտադրողի տեղակայանքների դրվածքային հզորությունը չի կարող գերազանցել երաշխավորված մատակարարի հետ՝ բաշխման ցանցին իր յուրաքանչյուր միացման կետի համար իբրև սպառող կնքած պայմանագրով ամրագրված առավելագույն թույլատրելի հզորությունը, բայց ոչ ավելի, քան 150 կՎտ-ը:

«Էներգետիկայի մասին» օրենքի 23-րդ հոդվածի 1-ին մասի և «Լիցենզավորման մասին» օրենքի 43-րդ հոդվածի 2-րդ մասի աղյուսակի 8-րդ բաժնի 2-րդ կետի համաձայն՝ 500 կՎտ առավելագույն սահմանաչափը գերազանցող հզորությամբ կայանների պարագայում դրանց կառուցման և շահագործման համար նախապես անհրաժեշտ է ստանալ էլեկտրական էներգիայի արտադրության լիցենզիա:

Թիվ 1518699 արձանագրությամբ 20.12.2022թ. հարուցվել է վարչական վարույթ: Կողմը, պատշաճ ծանուցված լինելով, ներկայացել է 16.01.2022թ. նշանակված վարչական վարույթի լուսններին և հայտնել, որ արձանագրված իրավախախտման հետ համաձայն չէ: Արևային կայանի հզորությունը չի գերազանցում 500 կվտ-ը, որը համապատասխանում է նաև Հայաստանի էլեկտրական ցանցերի կողմից տրված 13.04.2022թ-ին թիվ ՏՊ-300-0.4/0942 տեխնիկական պայմանին: Մասնավորապես՝ արևային կայանում տեղադրված է թվով 20 հատ 25 կվտ հզորությամբ փոխակերպիչներ, որոնց ընդհանուր հանրագումարը կազմում է 500 կվտ, որը նույնպես չի գերազանցում օրենքով սահմանված սահմանաչափը՝ անկախ արևային վահանակների քանակից և հզորությունից:

Կողմը ներկայացրել է նաև արևային փոխակերպիչների (թվով 20 հատ, յուրաքանչյուրը 25 կվտ հզորության) վերբերյալ ապացույցներ: Մասնավորապես՝ ՀԷՑ-ի կողմից տրված բաշխման ցանցին ինքնավար էներգաարտադրողի կայանի (հզորության) միացման թույլտվությունը, էլեկտրական էներգիայի մատակարարման և հատուցման թիվ 1002509 պայմանագիրը, առևտրային հաշվառքի սարքի մասին 20.04.2022թ-ին կնքված պայմանագիրը, «Արտաշատ-Վինկոն» ՓԲԸ-ի և «ԷկոՎիլ» ՍՊԸ-ի միջև 24.02.2022թ-ին կնքված կապալային աշխատանքների կատարման պայմանագրի հանձման – ընդունման թիվ 001 արձանագրությունը, լուսանկարներ և այլ փաստաթղթեր:

Վերոգրյալի հիմքով կողմը խնդրել է վարչական վարույթը կարճել:

«Վարչարարության հիմունքների և վարչական վարույթի մասին» ՀՀ օրենքի 10-րդ հոդվածի 1-ին մասի համաձայն վարչական մարմնի կողմից քննարկվող փաստական հանգամանքների վերաբերյալ անձի ներկայացրած տվյալները, տեղեկությունները համարվում են հավաստի բոլոր դեպքերում, քանի դեռ վարչական մարմինը հակառակը չի ապացուցել:

«Վարչարարության հիմունքների և վարչական վարույթի մասին» ՀՀ օրենքի 42-րդ հոդվածի 1-ին մասի համաձայն վարչական մարմինը վարչական վարույթում որպես ապացույց գնահատում է գործում առկա բացատրությունները, ցուցմունքները, փորձագիտական եզրակացությունները, փաստաթղթերը, նյութերը, իրերը, ինչպես նաև այն հանգամանքները, որոնք իր հայեցողությամբ այդ մարմինը պիտանի և անհրաժեշտ է համարում գործի փաստական հանգամանքների բացահայտման և գնահատման համար:

Նույն Օրենքի 57-րդ հոդվածի 1-ին մասի համաձայն գրավոր կամ գրավոր հաստատված վարչական ակտը պետք է պարունակի հիմնավորում, որում պետք է նշվեն համապատասխան որոշում ընդունելու բոլոր էական փաստական և իրավական հիմքերը:

Այսպիսով, վարչական վարույթ իրականացնող մարմինը վարչական վարույթի ընթացքում ձեռք բերված փաստական տվյալների և հիշյալ իրավակարգավորումների վերլուծությունից գտնում է, որ սույն դեպքով Ընկերության նկատմամբ վարչական ակտ ընդունելու հիմքերն ըստ էության բացակայում են, քանի որ առկա չեն բավարար ապացույցներ Ընկերության կողմից առանց համապատասխան լիցենզիայի լիցենզավորված գործունեություն իրականացնելու վերաբերյալ:

«Վարչարարության հիմունքների և վարչական վարույթի մասին» ՀՀ օրենքի 43-րդ հոդվածի 1-ին մասի բ) կետի համաձայն անձի և վարչական մարմնի փոխհարաբերություններում ապացուցման պարտականությունը կրում է վարչական մարմինը՝ անձի համար ոչ բարենպաստ փաստական հանգամանքների առկայության դեպքում:

Ելնելով վերոգրյալից և ղեկավարվելով «Վարչարարության հիմունքների և վարչական վարույթի մասին» ՀՀ օրենքի 50-րդ հոդվածի 2-րդ մասի բ) կետով, ՀՀ ՊԵԿ նախագահի պաշտոնակատարի 31.08.2022թ. N 904-Լ հրամանով՝

Որոշեցի

«ԱՐՏԱՇԱՏ-ՎԻՆԿՈՆ» ՍՊԸ-ի վերաբերյալ 20.12.2022թ. թիվ 1518699 արձանագրության հիման վրա հարուցված վարչական վարույթը կարճել:

ԻՐԱՎԱԲԱՆԱԿԱՆ ՎԱՐՉՈՒԹՅԱՆ ՊԵՏ



ԲԱՆԱԿԱՆԱԿԱՆ ՊԵՏ